

إِنَّ الدِّينَ عِنْدَ اللَّهِ الْإِسْلَامُ



لَا إِلَهَ إِلَّا اللَّهُ مُحَمَّدٌ رَّسُولُ اللَّهِ

Khutba Jummah

HADHRAT MUHYI-UD-DIN AL-KHALIFATULLAH

Munir Ahmad Azim

23 Juin 2017

(28 Ramadhan 1438 AH)

Après ki li fine salué tous so bane disciples (et tous bane Musulmans) entier le monde avec le Salaam - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor « **Bane conseils avant Eid-ul-Fitr »:**

Nous pé vive bane derniers jours de sa mois béni de Ramadhan là. So départ li vraiment imminent. Heureux à bane ki fine tire l'avantage complet de bénédictions de bane *Ibaadat* (actes d'adoration) et repentir. Rappel zot bien ki Ramadhan capave vine ene témoin sois en zot faveur ou contre zot. Bane ki fine gagne sa bénédiction pou rempli sa mois là avec la foi et bane bonnes actions, zot bizin remercier Allah pou sa grand faveur là et zot bizin contigner avec sa bon pratique là même après so départ. En vérité, la récompense pou *Roza* (carême) Ramadhan c'est Allah Li-même. Heureux à bane ki Allah fine choisir pou révèle So présence en déversant lor zot bane grâces et bénédictions ki cachiette dans bane *Roza* Ramadhan et dans la Nuit du Destin (*Laila-tul-Qadr*). En vérité, Allah zamais pas prive ene l'âme de so récompense juste et complet, ki li pour ene missié ou ene madame.

Allah dire dans Quran Shareef: **Alor, quiconque fer ene bien égale à poid ene atome (ou poids ene ti fourmi) pou retrouve li (auprès d'Allah).** (Az-Zalzalah 99: 8)

Allah fine ordonne bane Musulmans pou accompli bane tel actes d'*Ibaadat* à la fin de Ramadhan afin ki sa vine ene support dans nous l'expression d'amour et de dévotion envers Li, pou consolide nous la foi et augmente poids de nous bane bon actions. Parmi sa bane actes d'*Ibaadat* là, ena:

1) Récite **Takbir** (en d'autres mots, glorification de la grandeur d'Allah) dès premier la nuite de Shawwal, c'est-à-dire, dès le commencement de *Eid-ul-Fitr* ki commencer avec le coucher du soleil de dernier jour de Ramadhan.

Nous bizin garde à l'esprit ki dans l'Islam, concernant le degré d'importance, c'est la nuit ki vine avant lizour; tout sa parski bane mois islamiques calculer d'après calendrier lunaire. De ce fait, nouvo date Hijri commencer avec le coucher du soleil. Alor, si azordi c'est Vendredi (*Yaum'ul Jumu'ah*) 28 Ramadhan 1438 Hijri, alor, au moment ki Maghrib commencer, nous pou fini rentre dans Samedi (*Yaum'ul Sabti*). Et le fait ki nouvo jour commencer à partir de Maghrib, alor c'est pour sa ki kan arrive dernier jour de Ramadhan (ki capave 29 ou 30 jours), nous pas fer *Namaz Tarawih* (c'est-à-dire, bane *Namaz Nafl* de nuit, ki d'ordinaire fer en congrégation). La raison pour sa c'est simplement à cause nouvo jour de Eid fine fini commencer à partir Maghrib. Donc, kan nous pou trouve la lune, *Insha-Allah*, dimanche prochain, à soir (c'est-à-dire, kan pou arrive 30^{ème} Ramadhan), alor so à soir *Eid-ul-Fitr* pou fini commencer, et sa pou marque la fin de Ramadhan. Ene point ki mo bizin fer ressortir ici c'est ki en cas ki la lune de Ramadhan ou sois pou n'importe ki lézot mois islamique, pas visible lors so 30^{ème} jour, alor, la lune pas la lune (c'est-à-dire, trouve la lune ou non), nouvo jour de lotte nouvo mois pou fini commencer officiellement avec le coucher du soleil (de sa 30^{ème} jour là), parski dans l'Islam, d'après calendrier lunaire et *Hijri*, contrairement à calendrier solaire, pas ena 31 jours dans ene mois. Ene mois li sois 29 ou 30 jours, pas plisse ki sa.

Ene Hadith ki rapporté par Hazrat Aisha (ra): *Le Messenger d'Allah (saws) ti habitué compte bane jours de Shabaan dans ene façon ki li pas habitué compter pou aucaine bane les autres mois; ensuite li ti pé jeûner kan li fine trouve nouvo la lune de Ramadhan, mais si létemps ti couvert, li ti pé compte trente jours et ensuite li ti garde Roza.* (Abu Dawud).

Ene l'autre Hadith ki rapporté par Hazrat Abu Hurairah (ra): *Le Messenger d'Allah (saws) fine dire: N'importe kan zot trouve nouvo la lune (mois Ramadhan), garde Roza, et kan ou trouve li (c'est-à-dire, nouvo la lune de Shawwal), casse Roza, et si léciel couvert (kot zot pas trouve la lune), alor garde Roza pou 30 jours.* (Muslim).

De ce fait, sa c'est aussi la raison kifer nous commence récite *Takbir* pour Eid après Maghrib de dernier jour de Ramadhan, couma ti pratiquer par nous bien-aimé et noble prophète, Hazrat Muhammad (saws). Alor, sa la lune ki nous trouver après Ramadhan, c'est la lune de *Eid-ul-Fitr* (de 1^{er} Shawwal), et alor nous célébré le *Eid-ul-Fitr* et nous souhaite zot tous *Eid Mubarak*, et Ramadhan li alor officiellement terminer.

Allah dire dans Quran Shareef: **Li (Allah) oulé ki ou complète le nombre de jours ki fine prescrire (c'est-à-dire, pou garde Roza), et pou glorifier Li du fait ki Li fine guide ou; peut-être ki ou pou montrer ou reconnaissant.** (Al-Baqara 2: 186).

Proclamation de *Takbir* li comme suite: « **Allahu Akbar, Allahu Akbar, Laa Ilaaha Illallah, wallaahu Akbar, Allahu Akbar wa Lillaahil Hamd.** » (*Allah pli Grand, Allah pli Grand; Péna personne à être adorer aparte Allah; Allah pli Grand, Allah pli Grand et zis Li tousél ki digne de louanges*).

D'après *Sunnah* du Saint Prophète Muhammad (saws), bane croyants hommes zot recommander pou récite sa *Takbir* là fort dans bane Masjids, et dans zot la caze, surtout après bane *Namaz Farz* du moment ki la lune de Shawwal fine vine visible. Bane madames recommander pou récite zot *Takbir* doucement à cause zot fine être commander pou baisse zot la voix, mais si zot parmi bane madames, et ki pas ena aucaine missiés étrangers dans les paraze, alor pas ena aucaine mal si li récite so *Takbir* dans ene la voix plus éléver ki d'habitude (mais ki ni trop fort ni trop doucement aussi).

En plus de *Eid-ul-Jumu'ah* ki Allah fine accorder à So bane serviteurs croyants tous les Vendredis, Allah fine institué *Eid-ul-Fitr* (Eid de Casse *Roza*) et *Eid-ul-Adha* (Eid de Sacrifice) comme deux fêtes et moment de joie ki pli important pour bane croyants. Entre les deux Eid, *Eid-ul-Fitr* li en vérité vine deuxième dans rang d'importance, kot c'est *Eid-ul-Adha* (Bakr Eid) ki pli important ki tout. Tandis ki nous considère *Eid-ul-Adha* comme *Eid'ul Kabir* (Le plus grand Eid), *Eid-ul-Fitr* li *Eid'ul Saghir* (Pli tipti Eid). Et dans tous les deux Eids, la présence de tous bane croyants, hommes et femmes li capital parski couma mo fine déza dire avant, ene madame li aussi ene croyant et li ena so place dans *Masjid* ou *Eid Gah* (place kot *Namaz* et *Khutba* Eid ena lieu). Tous les deux ena le droit pou profite au maximum bane bienfaits et bénédictions de Eid, pas zis bane missiés.

Le Messenger d'Allah (saws) fine ordonne so bane suivants, hommes et femmes, pou accompli sa acte d'*Ibaadat* là. Li fine ordonne bane madames pou quitte zot la caze et vine de l'avant pour Eid et certainement sakaine bizin obéir so bane commandements, parski Allah fine dire dans Quran Shareef:

Ô bane croyants, obéir Allah et obéir le Messenger, et pas laisse ou bane actions perdi zot valeur (alle dans vide). (Muhammad 47: 34).

Hazrat Umm Atiyah (ra) fine rapporté: « *Nous ti habitué recevoir l'ordre pou sorti (de nous la caze) le jour de Eid et pou même amène (avec nous) bane jeunes filles de zot la caze et aussi bane madames ki dans zot règles afin ki zot capave deboute derrière bane missiés et récite le Takbir ensam avec zot et invoque Allah ensam avec zot et espère pou gagne bane bénédictions de sa jour là et pou être purifier de bane péchés.* »

Dans ene l'autre version:

Hazrat Umm Atiyah (ra) fine rapporté: « *Le Messenger d'Allah fine ordonne nous pou quitte nous la caze pour Namaz Eid-ul-Fitr et Eid-ul-Adha, et aussi bane madames adultes, bane ki dans zot règles et bane vierges. Kan à bane ki dans zot règles, zot bizin reste ene distance kot fer Namaz mais zot bizin participe dans bane bons actions et duahs. Hazrat Umm Atiyah fine intèrrompe le Messenger d'Allah (saws) kot li fine demande li (saws): 'Ô Messenger d'Allah, ena parmi nous ki pas ena ene grand robe (Jilbab)!' Li fine réponne: 'Li (c'est-à-dire, sa madame ki pas ena ene grand robe pou couvert li) capave prend sa prêté avec so camarade.'* » (Bukhari & Muslim).

2) (Ene l'autre acte d'Ibaadat après récitation de Takbir, c'est pou donne le Sadaqat-ul-Fitr). Le **Sadaqat-ul-Fitr** (aussi connu couma Zakat-ul-Fitr) - faudé pas confondre Zakat-ul-Fitr avec Zakaat ki ene de bane piliers de l'Islam - (alor Zakat-ul-Fitr/ Sadaqat-ul-Fitr) li ene charité obligatoire pou sak Musulman ki possède ene *Nisab* (c'est-à-dire, ene minimum montant de richesse). Bizin fini paye sa avant ki Namaz Eid-ul-Fitr commencer, ki veut dire sa c'est limite kot capave paye Sadaqat-ul-Fitr (ou capave paye li dans Ramadhan même et ziska Namaz Eid, pas après).

Hazrat Abdullah Ibn Umar (ra) fine rapporté: « *Le Messenger d'Allah (saws) fine ordonne bane dimounes pou paye Zakat-ul-Fitr avant ki zot alle fer Namaz Eid.* »

Hazrat Abdullah Ibn Umar (ra) fine rapporté: « *Le Messenger d'Allah (saws) fine ordonne pou paye **1 Sa'** de dattes ou 1 Sa' de l'orge couma Zakat-ul-Fitr lor sak esclave Musulman ou Musulman ki libre, ki li missié, madame, jeune ou vieux, et li fine ordonne ki bizin fini paye sa avant ki bane dimounes sorti pou alle fer Namaz Eid. (**1 Sa'** = **3 Kilogrammes** approximativement).*

Hazrat Abu Said Al Kudri (ra) fine rapporté: « *Nous ti habituer donne 1 Sa' de repas (manger) ou 1 Sa' de l'orge ou 1 Sa' de dattes, ou 1 Sa' de fromage blanc ou 1 Sa' de raisins (c'est-à-dire, raisins secs) couma Zakat-ul-Fitr (par tête/ dimoune).* » (Bukhari & Muslim).

Sa fer moi rappelle pou dire zot, ki li recommander d'après *Sunnah* de nous bien-aimé prophète Hazrat Muhammad (saws) pou mange détrois dattes/ tames dans ene nombre impairs avant nous quitte la caze pou alle pour *Namaz Eid-ul-Fitr*. Dans ene Hadith rapporté par Hazrat Anas bin Malik (ra), li fine dire: « *Le Messenger d'Allah (saws) pas ti pé quitte so la caze pour le Eid-ul-Fitr tanque ki li pas fine mange détrois tames dans ene nombre impaires.* » (Bukhari & Ahmad).

En tous les cas, nous bizin célébrer *Eid-ul-Fitr*, spécialement fer *Namaz Eid* dans ene façon ki pli humble et dévoué. Bane croyants, hommes et femmes fine être appelé pou habille zot avec bane linges propres sa jour là et pou embellir zot à l'intérieur de zot-mêmes par la récitation de *Takbir* (Glorification de la Grandeur et l'Unicité d'Allah) et tous bane les autres actes d'*Ibaadat* et bane *Zikrullah* (Rappel d'Allah) aussi bien ki bane bons actions. Sa li vraiment ene jour de réjouissance, spécialement pou bane ki fine observe tous bane commandements et exigences de Ramadhan de façon légitime couma Allah fine ordonner. Pour zot très certainement sa pou ene vrai Eid. Alor mo souhaite à tous mo bane disciples et suivants entier le monde, ainsi ki le reste de bane Musulmans du monde entier ene **EID-UL-FITR MUBARAK**. Ki Allah béni zot tous et accepter zot bane sacrifices dans sa mois béni là et fer zot gagne So approbation et So bane bénédictions. *Ameen*.